



Primeiru-Ministru

Diskursu husi

S. Exa. Primeiru-Ministru

Majór-Jenerál Taur Matan Ruak

**Iha okaziaun Serimónia Simu Pose, Faze da-2,
VIII Governu Konstitusionál**

Palásiu Prezidente Nicolau Lobato

Bairru Pité, Dili,

Loron 9 fulan-jullu tinan 2018

S. Exa. Prezidente Repúblika, Señor Francisco Guterres Lú Olo no Espoza
S. Exa. Prezidente Parlamentu Nasionál, Señor Arão Noé Amaral
S. Exa. Prezidente Tribunál Rekursu, Señor Deolindo Santos
S. Exa. Primeiru-Ministru Governu Konstitusionál VII, Señor Marí Alkatiri
S. Exa. Eis-Titulár sira husi Órgaun Soberania nian
S. Exa. Reverendísimu Señor Bispu sira husi Baukau, Dili no Maliana

Distintu Señor Membru Parlamentu Nasionál sira
Distintu Señor Membru Governu sira
Distintu Señor Membru sira husi Rejiaun Autónoma Espesiál Oekusi-Ambenu nian

Exelentísimu sira
Señor Prokuradór-Jerál Repúblika nian
Señor Xefe Estadu-Maiór Jenerál Forsa Armada nian
Señor Komandante Jerál Polísia Nasionál nian

Exelentísimu sira
Señor Representante sira Korpu Diplomátiku nian
Señor Representante husi Ajénsia Internasionál sira
Señor Representante sira husi Sosiedade Sivíl

Señora no Señor

Distintu konvidadu sira,

Ho laran ksolok tebes mak ita simu inísiu ba knaar Ministru Defeza nian, Señor Bigadeiru-Jenerál Filomeno da Paixão de Jesus, ne'ebé hahú ohin integra iha Governu Konstitusionál VIII.

Ho serimónia solene ida-ne'e, ita kompleta tan faze ida ba prosesu konstituisaun plena ba governu ida ne'ebé sei lidera ita-nia Nasaun nia destinu iha tinan lima oinmai, tuir ita-nia povu ninia hakarak ne'ebé hato'o iha Eleisaun Lejizlativa Antesipada liubá ne'e.

Tanba ne'e, ami hakarak agradece ba S. Exa. Prezidente Repúblika ba ninia abertura no kooperasaun institusionál di'ak, ne'ebé permite atu viabiliza nomeasaun ba responsavel ezijente iha área governasaun maka Defeza Nasionál.

Ami fiar katak – ho “*manutensaun no aprofundamentu husi diálogu ne'ebé halo tiha ona entre Xefe Estadu no Xefe Governu, kona-ba personalidade ne'ebé tenke hetan nomeasaun atu tama iha Governu, iha tempu badak nia laran ami sei rezolve impase polítiku ne'ebé akontese daudaun ne'e*” – tenke remata ona nomeasaun no pose ba membru Governu sira seluk.

Sistema governu semi-prezidensiál ne'e ezijente no obriga responsavel polítiku sira hotu halo esforsu nafatin, liuliu ba sira ne'ebé maka hanesan titulár ba órgaun soberania sira atu tenke buka halo diálogu, debate no hetan solusaun sira ba kompromisu ne'ebé bele viabiliza funsionamentu Estadu nian no, ho ida-ne'e, labele fó obstákulu ka impede dezvoltamentu no hadi'a kondisaun moris ita-nia Povu nian.

Demokrasia la obriga atu hotu-hotu tenke iha ideia hanesan, opiniaun hanesan ka vizaun política hanesan kona-ba futuro ita-nia Nasaun nian. Maibé domin ne'ebé, laho exesaun, ne'ebé mak ita iha ba ita-nia Pátria no ba ita-nia Povu, obriga ita atu sai firme hodi buka nafatin konsensu no solusaun sira ne'ebé hanesan atubele hatán ba interese públiku nian.

Ha'u sente seguru, iha kadru normalidade konstitusionál nia laran, katak ita hotu sente orgullu, no regula husi prinsipiu sira respeitu no lealdade institusionál nian, Xefe Estadu no Xefe Governu sei kontinua halo diálogu atu buka solusaun no kompromisu sira ne'ebé bele viabiliza lalais liu tan, konkluzau kona-ba formasaun Governu Konstitusionál VIII nian.

Ha'u hakarak agradece mós ba kompriensaun no kolaborasaun di'ak husi Señor Brigadeiru-Jenerál Filomeno da Paixão de Jesus, ne'ebé atu husik nia kargu tenke liuhusi prosesu jurídku-administrativu ne'ebé mak ezijente tebetes, inklui konvokasaun ida husi *Konsellu Ministrus* no *Konsellu Nasionál Defeza no Seguransa* nian extraordináriu ne'ebé fó-dalan atu nia mós bele kontinua serve ita-nia Pátria doben, hanesan nia nafatin halo ona, durante nia moris, agora ho funsaun governativa sira.

Sai hanesan onra ida boot tebes atubele mós konta iha ita-nia ekipa ho Ilustre Brigadeiru-Jenerál ida, ne'ebé leál, onestu, experiente, kompetente no ho rekoñesidu méritu iha servsiu sira ne'ebé fó ona ba ita-nia Nasaun durante *Luta ba Libertasaun Nasionál* no durante besik tinan ruanulu ba konstrusaun Forsa Defeza nian ida ne'ebé modernu, profisionál no efisiente, atubele hatán ba dezafiu lubun hirak interna no externa nian, iha Mundu ida ne'ebé modernu liután no inter-dependente.

Señor Presidente República,

Distintu konvidadu sira

Iha ninia diskursu iha loron 22 fulan-juñu tinan 2018, ba okaziaun tomada pose inisiál Governu ida-ne'e nian, nia temi ona katak presiza estabesele duni "*Zona Dezenvolvimentu no Prosperidade Rejionál*" ida, ne'ebé bazeia ba "*reforsu ba dame, estabilidade no konfiansa Povu nian iha instituisaun sira*".

Ami fiar katak, ho nomeasaun ida-ne'e, bele hatán ba prioridade sira husi V. Exa., hodi reforsa kompromisu Timor-Leste nian atu kontribui ba estabilidade, prosperidade, seguransa no armonia, interna no externa, ba ita-nia Nasaun, kondisaun fundamentál sira ba ita-nia adezaun ba ASEAN no ba konsolidasaun di'ak ba ita-nia Estadu Direitu Demokrátiku.

Ami fiar mós katak iha kondisaun atubele hatán ba nesesidade sira dame nian, ne'ebé ezije husi ita-nia Povu no fundamentál ba prosesu dezenvolvimentu individu no koletivu, sustentavel no kontinuadu ida.

Ba nasaun ida ne'ebé metin buras, matenek no moris di'ak!

Ba Timor-Leste ida: Riku, Forte no Seguru!

Obrigadu barak ba ita-boot sira-nia atensaun.

Maromak haraik bensaun mai ita hotu!